

समे – 12:25

<><><><><>

PM-IWD

प्रधानमंत्री नरेन्द्र मोदी होरें अंतर्राष्ट्रीय महिला दिवस दे मौके पर अज्ज गुजरात दे नवसारी च लक्खपति दीदिएं कन्नै गल्लबात कीती, जेह्दे बाद ओ इक बड़्ढे जलूस दी शक्ति च इक सार्वजनिक समारोह च शामिल होआ करदे न। इस कार्यक्रम च शामिल होने लेई लक्खें बद्धे लोकें दी गिनतरी च टकोह्दा करियै महिला उत्थें पुज्जी दियां न जिंदे च केई लक्खपति दीदियां शामिल न। प्रधानमंत्री उत्थें पुज्जी गेदे ते हुपै कोला किश चिर मगरा जनसभा गी संबोधत बी करने आले न। मेद ऐ जे ओ केई चाल्ली दिऐं योजनाएं दी शुरूआत करगंन।

<><><><><>

IWD Greetings

अंतर्राष्ट्रीय महिला दिवस दे मौके पर प्रधानमंत्री नरेन्द्र मोदी होरें मुख्य भरै दिऐं महिलाएं गी ममारकबाद ते शुभकामना दिंदे होई एह गुजारिश कीती ही जे ओह नमो ऐप्प ओपन फोरम पर अपने विचार सांझे करन। इक विशेष पैहलकदमी दे तौर उप्पर प्रधानमंत्री होरें एह ऐलान बी कीते दा ऐ जे अंतर्राष्ट्रीय महिला दिवस दे मौके उप्पर ओह अपने सोशल मीडिया एकाउंटें दी कमान, चुनी गेदी महिलाएं गी सौपडन। तोआई अंतर्राष्ट्रीय महिला दिवस दे मौके लेफ्टिनेंट गवर्नर मनोज सिन्हा होरें पूरी नारि शक्ति गी बघाई दिंदे होई राष्ट्र दी तरक्की च उंदे जोगदान लेई आभार जताया ऐ। उ'नें आखेआ ऐ जे कार्यबल च महिलाएं दी मती भागीदारी, भारत गी विकसित राष्ट्र बनाने च मदाद करोग। मुख्मन्त्री उमर अब्दुल्ला होरें बी अंतर्राष्ट्रीय महिला दिवस दे मौके पर सब्बने महिलाएं गी शुभकामनां दित्तियां न।

<><><><><>

IWD(RNU)

जियां जे पैहले बी खबर दित्ती जाई चुकी दी ऐ जे अज्ज अंतर्राष्ट्रीय महिला दिवस ऐ। हर ब'रे 8 मार्च गी एह ध्याड़ा महिलाएं लेई समाजी बरोबरी, उंदे अधिकारें ते उपलब्धिएं गी सम्मान देने लेई मनाया जंदा ऐ। एह ध्याड़ा समाज च महिलाएं दी भूमिकस, संघर्ष ते कामयाबिएं गी दर्शांदा ऐ।

इस ब'रे लेई अंतराष्ट्रीय महिला दिवस दा विषय सार ऐ "सबबने महिलाएं ते कुड़िएं लेई अधिकार, बरोबरी ते सशक्तिकरण देश ते दुनिया दे बाकी हिस्से आला लेखा जम्मू च बी बक्ख-बक्ख संगठने आस्सेआ एह ध्याड़ा मनाया जा'रदा ऐ। जम्मू कश्मीर कला संस्कृति ते भाषा अकादमी आस्सेआ अज्ज इस मौके इक बहु भाषाई मुशायरे दा सरिस्ता कीता गेदा ऐ। महिला काव्य मंच आस्सेआ महिला कालेज परेड दे सैहयोग कन्नै बी इक विशेष कार्यक्रम दा सरिस्ता कीता जा'रदा ऐ। आकाशवाणी दे क्षेत्रीय समाचार एकांश जम्मू नै बी महिला दिवस दे मौके पर अपने महिला सैहकर्मिएं गी बडलै दफ्तर पुज्जदे गै फुल्ल भेंट करियै उंदा सतकार कीता। समाचार एकांश दे प्रभारी एन.गुलशन रैणा होरें इस मौके आखेआ जे महिला अज्ज कुसै बी क्षेत्र च कुसै कोला घट्ट जां पिच्छे नेई न। उनें आखेआ जे समाज दे हर वर्ग, हर घर, हर इदारे ते हर संगठन गी महिलाएं दा आदर करना लोड़चदा ते 2047 तगर भारत गी इक विकसित राष्ट्र बनाने लेई उनेंगी हर कम्मै च योगदान लेई प्रेरत करना ते मौका देना लोड़चदा।

<><><><><><>

IWD Sahitya Academy

डोगरी दी नामवर लखारी, अनुवादक ते शिक्षाविद प्रो. अर्चना केसर होरें गी साहित्य अकादमी अवार्ड कन्नै सम्मानत कीता गेआ ऐ। एह सम्मान उनेंगी भीष्म साहनी हुंदे मशहूर हिंदी नावल "तमस" दे डोगरी अनुवाद लेई दित्ता गेआ ऐ। प्रो. अर्चना केसर होरें हिंदी दे इलावा केई पंजाबी, उड़िया ते अंग्रेजी कताबें दा बी डोगरी च अनुवाद करी चुकी दियां न। भारत दे संविधान दा डोगरी च अनुवाद करने च उंदा टकोहदा योगदान रेहा। ओह उस अनुवाद पैनल दियां कन्वीनर हियां।

<><><><><><>

KIWG 2025

कश्मीर घाटी दी गुलमर्ग थाहर आयोजित होने आहली खेलो इंडिया विंटर गेम्स दे दुए चरण लेई हून छड़ा इक्क गै ध्याड़ा रेही गेदा ऐ ते एहदे लेई सब्भै तैयारियां बी पूरी करी लैती गेदिआं न। इ'नें स्यालु खेड्डें दा आयोजन कल 9 मार्च थमां लेइयै 12 मार्च तोहड़ी कीता जा'रदा ऐ। घाटी दे केई सारे हिस्सें च घट्ट बर्फबारी होने करी पैहले इ'नें खेड्डें गी अगड़ा पाया गेआ हा पर पिच्छले दिनें होई दी खरी मती बर्फबारी दे बाद इ'नेंगी 9 मार्च थमां आयोजित करने दा ऐलान कीता गेआ।

जम्मू-कश्मीर प्रशासन ते खेड्ढ काउंसल आसेआ प्रतिभागिएं ते सैलानिएं दे अनुभव गी बेहतर बनाने लेई सब्भै संभव जतन कीते जा करदे न।

<><><><><><>

Marathon

जम्मू कश्मीर पुलस आस्सेआ औंदी 16 मार्च गी अपने सिविक एक्सन कार्यक्रम तैहत् जम्मू मैराथन 2025 दा सरिस्ता कीता जा'रदा ऐ। इस आयोजन लेई तैआरिएं दी समीक्षा लेई कल एडीजीपी आमर्ड पुलस आनंद जैन हुंदी अध्यक्षता च आमर्ड पुलस मुख्यालय च बैठक लग्गी जेह्दे च तैआरिएं दे बक्ख-बक्ख पैहलुएं पर चर्चा कीती गई। एह्दे च 21 किलोमीटर हॉफ मैराथन, 10 किलोमीटर रेस ते 2 किलोमीटर रन फॉर फन शामिल न जिसी 16 मार्च गी बडलै पौने 7 बजे झंडी दस्सियै रवाना कीता जाग।

<><><><><><>

TB

निक्के ताप यानि टी.बी बमारी दे मरीजें गी बेहतर दिक्खभाल उपलब्ध कराने दे मकसद जम्मू कश्मीर प्रदेश ते जिला टी.बी नियंत्रण समिति जम्मू आस्सेआ इक विशेष मुहिम शुरू कीती गई ऐ। निक्षय पोषण योजना तैहत् टी.बी दे मरीजें गी "खुश्क बास्केट" भेंट कीतियां गेइयां जिंदे च चौल, दुध पोडर, विशेष आदटा, तेल ते शरीरै च जरूरी तत्वें दी कमी दूर करने आले मल्टीविटामिन होंदे न जेह्दे इनें मरीजें दी खुराक च होने लोड़चदे। ध्यानजोग ऐ जे सेही खुराक कन्नै टी.बी कारण मौत दी शैका गी 60 प्रतिशत तगर घट्ट कीता जाई सकदा ऐ।

<><><><><><>